

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

PREMIS YANG MENJALANKAN AKTIVITI PENJUALAN MINYAK MASAK SECARA DALAM TALIAN DISERBU KPDNHEP

PUTRAJAYA, 4 Julai 2022 – Kementerian Perdagangan Dalam Negeri dan Hal Ehwal Pengguna (KPDNHEP) berjaya menumpaskan aktiviti penjualan minyak masak secara dalam talian melalui platform e-dagang terkenal dalam negara di dua (2) premis berasingan masing-masing di Petaling Jaya dan Puchong, Selangor pada 1 Julai 2022.

2. Serbuan yang dilakukan pada jam 12.00 tengah hari itu dengan kekuatan keseluruhan seramai tujuh (7) orang anggota penguat kuasa daripada KPDNHEP Selangor adalah hasil maklumat aduan yang diterima daripada orang awam. Premis yang diserbu di Petaling Jaya merupakan sebuah premis kediaman yang disewa untuk dijadikan stor penyimpanan dan pembungkusan barang-barang runcit yang dijual secara dalam talian manakala premis yang diserbu di Puchong adalah premis rumah kedai yang juga dijadikan stor penyimpanan dan pembungkusan barang-barang runcit yang dijual secara dalam talian.

3. Hasil pemeriksaan ke atas premis di Petaling Jaya itu, pihak berkuasa telah menemukan sejumlah 255 kg minyak masak paket 1 kg bersubsidi bersama beberapa jenis barangan runcit lain yang disimpan di dalam premis terbabit sebelum dijual/diedar kepada pelanggan secara dalam talian.

4. Hasil pemeriksaan lanjut mendapati hanya barang kawalan minyak masak paket 1 kg sahaja ditemukan oleh pihak KPDNHEP dan premis gagal mengemukakan sebarang dokumen kebenaran di bawah Akta Kawalan Bekalan 1961 daripada Pengawal Bekalan untuk berurusan dengan barang kawalan berjadual itu. Hasil maklumat yang diperolehi, minyak masak paket tersebut dijual pada harga RM 2.50/kg.

5. Pasukan serbuan telah mengambil tindakan ke atas premis terbabit kerana disyaki melakukan kesalahan di bawah Seksyen 16 Akta Kawalan Bekalan 1961 iaitu menjual barang kawalan tanpa lesen dan Subperaturan 3(1) Peraturan-Peraturan Kawalan Bekalan 1974, iaitu mana-mana orang tidak boleh berurusan secara borong dan runcit apa-apa barang berjadual tanpa lesen yang dikeluarkan di bawah Peraturan 4 Akta yang sama.

6. Seorang lelaki warga tempatan yang mengaku sebagai pembantu/pekerja premis terbabit telah direkodkan keterangan bagi membantu siasatan. **Sejumlah 255 kg minyak masak paket 1 kg telah disita bersama beberapa dokumen perniagaan lain untuk siasatan lanjut. Nilai keseluruhan rampasan dianggarkan berjumlah RM 637.50.**

7. Dalam serbuan berasingan, pemeriksaan ke atas premis di Puchong pula, pasukan serbuan telah menemukan sejumlah minyak masak kemasan botol 1 kg, 2 kg dan 3 kg dalam premis terbabit.

8. Hasil pemeriksaan lanjut, pihak premis telah mengemukakan lesen runcit di bawah Akta Kawalan Bekalan 1961 yang masih sah tempohnya

namun alamat didaftarkan dalam lesen itu berbeza daripada alamat premis yang menyimpan barang-barang kawalan terbabit.

9. Seorang wanita warga tempatan yang mengaku sebagai penyelia premis berkenaan telah direkodkan keterangan bagi membantu siasatan kerana disyaki melakukan kesalahan di bawah Sekyen 20(1) Akta Kawalan Bekalan 1961 iaitu menyimpan apa-apa barang yang dikawal selain daripada premis yang dilesenkan.

10. Sejumlah 27 unit minyak masak kemasan botol 1 kg, 2 kg dan 3 kg telah disita bersama beberapa dokumen perniagaan lain untuk siasatan lanjut. Nilai keseluruhan rampasan dianggarkan berjumlah RM 858.00.

11. Kertas siasatan telah dibuka dan siasatan lanjut terhadap kedua-dua kes berkenaan akan dilakukan di bawah Akta Kawalan Bekalan 1961 bagi mengenalpasti rangkaian pengedaran minyak masak terbabit termasuklah maklumat daripada mana bekalan minyak masak tersebut diperolehi.

12. Jika sabit kesalahan boleh didenda tidak lebih RM 1,000,000.00 (Ringgit Malaysia Satu Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM 3,000,000.00 (Ringgit Malaysia Tiga Juta).

13. Selain itu, syarikat juga boleh disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) (Akta 613) iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan barang kawalan bersubsidi terutamanya berkaitan minyak masak.

14. Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

15. KPDNHEP ingin memberi amaran keras kepada semua peniaga yang berurusan dengan barang kawalan dan bersubsidi terutamanya minyak masak agar sentiasa mematuhi perundangan yang telah dikuatkuasakan dan menegaskan bahawa Kementerian tidak akan berkompromi dengan mana-mana pihak yang didapati terlibat dalam penyelewengan barang kawalan seumpama ini.

16. Masyarakat disaran untuk menjadi mata dan telinga kepada pihak berkuasa dengan memberikan kerjasama sekiranya mempunyai sebarang maklumat berhubung aktiviti penyelewengan barang kawalan dan bersubsidi bagi memastikan aktiviti haram ini dapat dibanteras sehingga ke akar umbi.

17. Orang ramai yang mempunyai sebarang maklumat berhubung penyelewengan barang kawalan dan bersubsidi boleh menyalurkan aduan yang lengkap kepada pihak Kementerian melalui saluran berikut:

- i. WhatsApp 019-279 4317 / 019-848 8000
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

Azman bin Adam
Pengarah Penguat Kuasa
Kementerian Perdagangan Dalam Negeri
dan Hal Ehwal Pengguna,

PUTRAJAYA, 4 Julai 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

